

Neujahrsapéro 2013, 6. Januar 2013, Schloss Laupen

Liebi Froue u Manne, sehr geehrti Frou Regierigrätin, sehr geehrte Herr Ober-
amtmaa, liebi Gescht vo nach und färn

Im Name vor liwohnergmeind Loupe u vor Stiftig Schloss Loupe darf ig öich alli
hie obe uf em Schloss zu däm zwöite Nöijahrsapero begrüesse. Zum erschte
Mau isch es aber so, dass itz die nöii Stiftig, sozsäge als Bsitzere vo däm Schloss,
iglade het - die Stiftig, wo das Schloss sit churzer Zyt und in eigeter Regie ver-
waltet.

Es isch bsungers chön, dass mer hüt o höche Bsuech dörfe empfah, hie, im stille
Weschte. I ha mir natürlech guet überleit, was me da churz u prägnant chönnti
säge, we men e Huuffe Lüt amen e söttige Aalass darf begrüesse. U de ersch no
am Aafang vom ne nöie Jahr. Em Aafang vor e nöie Gschicht uf üsem Schloss.
Em Aafang vom ne wichtige u vielleicht o chli wägwisende Jahr für Bärn West.

I wott ja nume churz rede. Drum hie mini paar Gedanke, bevor ig de dr Frou Eg-
ger darf ds Wort übergäh: Für Loupe stöh i däm u i de nöchschte paar Jahr ganz
wichtige Entscheidige u Projekt bevor: Mir wei üsi Verkehrsproblem löse -
Stichwort Ortsdurchfahrt -, mir sötte o unbedingt dr Hochwasserschutz ar Sen-
se verbessere, d Brügg saniere - gmeinsam mit em Kanton; dr öffentlech Ver-
kehr überchunnt es nöis Gsicht - mir danke a d'Bahnhofverlegig, wo mer mit
SBB, BLS und o mit em Kanton zäme wette voratribe; es nöis lichoufszäntrum u
viel zuesätzleche Wohnruum wird ds Läbe i üsem Stedtli markant verändere -
gmeinsam mit de Inveschtore und em Coop sueche mer da - nid nume uf em
Polyareal - nach de beschte Lösige; mit de Burgergmeind Loupe und em plante
Wärmverbund wei mer o nid nume d Heizproblem im Schuelhus löse; u
schliesslech isch ds Schloss Loupe vor e Stiftig übernoh worde, wo nöis Läbe i
die alte Muure bringt - zäme mit em Kanton, mit grosszügige Gemeinde us em
Kanton Bärn u Friburg, mit de Burger, mit Inschtitutione u vilne Einzelpersone.
Das si nume es paar wenigi Stichwort gsi. Aber alli hei öppis gmeinsam, und es
git es völlig simpels Rezäpt: Es geit nume, we mer zäme schaffe, we mer ge-
meinsami Ziel wei erreiche, über Partei-, Kantons- u Gemeindsgränze ewäg. Al-
lei söttegi Sache z'bewege? Unmöglich! Drum - das isch scho fasch mini Über-
leitig: Liebi Frou Egger, mir danken ech scho itz, dass o dir mit üs im nöie Jahr
zäme schaffet u mithälfet, dass Loupe nid nume 1339 wichtig gsi isch für Bärn.
Mir fröien üs, dass dihr hüt zuen is sit cho, mir fröien üs uf öii Wort. Uf en es
guets 2013! Em Schloss, em Kanton, dr Gemein, öich allne. I ha fertig!

René Spicher